

Manu Taratahi

nā Fiona Green

Amokura

He Whakatau

Me mātua pānui kia marama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. He aha ngā mahi a te manu taratahi?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

E mōhio ana te ākonga ki ngā rawa hei hanga i tētahi manu taratahi? Kua kite te ākonga i tētahi manu taratahi? Kua turu te ākonga i tētahi manu taratahi? I pēwhea te rere a taua manu taratahi? Matapakia ētahi āhuatanga o tētahi manu he pai te rere.

He Matapaki

Tirohia te pai o te pānui a te ākonga

I te wā o te matapaki me pānui te ākonga te katoa, tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e marama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o tēnei pukapuka?
2. I aha te manu taratahi?
3. Nā te aha i āhei ai te manu taratahi te rere?
4. Kei te pupuri te tama ki te aha?
5. Mehemea kei a koe ngā rawa katoa hei hanga manu, ka pēwhea tō hanga?

Ngā whakautu ki ngā whakapuaki māramatanga

1. He kōrero mō tētahi tama e ngākaunui ana ki te turu i tana manu taratahi.
2. I tau, i piki, i topa, i rere, i huri, i ruku, i tūtuki te manu taratahi.
3. Nā te tō haere a te tama i te manu i a ia e oma ana, nā te pūpuhi a te hau i āhei ai te manu te rere.
4. Ki te aho.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

I He āta titiro, he tāutu i ngā kupu waiwai.

He whakatakinga ā-roro, he whakaharatau

I mua i te pānui pukapuka, matapakia ngā rawa hei hanga manu taratahi. Matapakia me pēwhea te hanga i tētahi manu taratahi.

He aha te āhua o te manu taratahi?

He aha ngā āhua manu tukutuku ka taea?

Kia oti i te ākonga te pānui pukapuka, matapakia te hanga manu taratahi. Matapakia ngā momo manu huri noa i te ao.